

**S T A T U T**  
**političke organizacije „Platforma za progres“**

Banja Luka, 24. novembar 2019. godine

Na osnovu člana 14. Zakona o političkim organizacijama („Službeni list SR Bosne i Hercegovine“, broj 27/91) i člana 19a. Statuta političke organizacije „Platforma za progres“, usvojenog dana 25. novembra 2018. godine, Skupština političke organizacije „Platforma za progres“, održana dana 24. novembra 2019. godine, donijela je

## **STATUT**

### **političke organizacije „Platforma za progres“**

#### **DIO PRVI - OPĆE ODREDBE**

##### **Član 1.** **(Predmet)**

Statutom političke organizacije „Platforma za progres“ (u daljem tekstu: Statut) utvrđuje se: naziv, pravni status, znak, sjedište, unutrašnja organizacija, oblici organizovanja po teritorijalnom principu, organi i radna tijela, kao i način njihovog izbora i opoziva, trajanje mandata i način odlučivanja, sredstva za rad i postupanje s imovinom, zastupanje i predstavljanje, koordiniranje i učešće u vlasti, kao i druga pitanja od značaja za članstvo i djelovanje političke organizacije „Platforma za progres“ (u daljem tekstu: Platforma).

##### **Član 2.** **(Pravni status)**

- (1) Platforma je politička organizacija centra, utemeljena kao organizacija slobodno i dobrovoljno udruženih građana Bosne i Hercegovine, radi ostvarivanja političkih ciljeva i volje građana, upisana u Registar političkih organizacija koji se vodi kod nadležnog državnog organa u Bosni i Hercegovini.
- (2) Platforma ima svoj žiro račun i devizni račun, a u pravnom prometu s trećim licima za preuzete obaveze odgovara vlastitim sredstvima.
- (3) Platforma djeluje u Bosni i Hercegovini na osnovu Programske deklaracije Platforme (u daljem tekstu: Program) i u dijaspori poštujući pozitivnopravne propise tih država, a u skladu s ovim statutom.
- (4) Lokalni i regionalni organizacioni oblici Platforme djeluju na osnovu ovlaštenja i nemaju status pravnog lica.

##### **Član 3.** **(Naziv i sjedište)**

- (1) Puni naziv političke organizacije je „Platforma za progres“.
- (2) Skraćeni naziv političke organizacije je „Platforma“.

(3) Sjedište Platforme je u ulici Branilaca Sarajeva 33/1 u Sarajevu.

(4) Odluku o promjeni sjedišta Platforme donosi Predsjedništvo Platforme.

**Član 4.**  
**(Obilježja)**

(1) Platforma ima logo i zastavu. Odluku o izgledu loga i zastave donosi Predsjedništvo Platforme.

(2) Platforma ima svoj pečat. Pečat je okruglog oblika, prečnika 30 mm, sa oznakom punog naziva Platforme, ispisanog latiničnim i čiriličnim pismom. Odlukom Predsjedništva Platforme utvrđuje se način korištenja, čuvanja i broj pečata.

**Član 5.**  
**(Jezik, pismo i terminologija)**

(1) U radu Platforme u ravnopravnoj upotrebi su bosanski, hrvatski i srpski jezik. Službena pisma su latinica i čirilica.

(2) Gramatička terminologija, korištenja muškog i ženskog roda za pojmove u ovom statutu uključuje oba roda.

(3) Termin „dijaspora“ čine državlјani Bosne i Hercegovine koji Bosnu i Hercegovinu smatraju svojom matičnom zemljom, a žive izvan njenih granica.

**DIO DRUGI – CILJEVI I ZADACI**

**Član 6.**  
**(Ciljevi i zadaci)**

Ciljevi i zadaci Platforme su:

- a) izgradnja sistema koji će osigurati da Bosna i Hercegovina funkcioniše kao građanska, demokratska država koja svojim vanjskim i unutrašnjim djelovanjem prvenstveno radi na očuvanju i promociji države i stvaranju boljih uslova za život svih njenih građana i dijaspore;
- b) uspostavljanje vladavine prava i eliminisanje kriminala i korupcije u Bosni i Hercegovini, gdje predstavnici organa vlasti, javnih ustanova, preduzeća i svih pravnih subjekata donose odluke na odgovoran i pravedan način prema državi, pravnim subjektima za koje su odgovorni i svim njenim građanima i dijaspori;
- c) omogućavanje građanima, bez diskriminacije po bilo kojoj osnovi, da biraju i budu birani u organe na svim nivoima unutar države Bosne i Hercegovine;
- d) borba za prava građana u zemlji i inostranstvu, ali i za njihovo prihvatanje obaveza prema državi i zajednici;

- e) jačanje ekonomije koja će u skoroj budućnosti omogućiti životni standard građana Bosne i Hercegovine na nivou srednje razvijenih zemalja;
- f) uspostavljanje principa odgovornosti, sposobnosti, integriteta i etike umjesto podobnosti, nepotizma i korupcije u svim segmentima političkog, privrednog i društvenog života;
- g) uključivanje mlade populacije iz Bosne i Hercegovine i dijaspore u procese donošenja odluka od strateškog značaja za Bosnu i Hercegovinu i za javno dobro svih njenih građana i dijaspore;
- h) uključivanje svih kapaciteta dijaspore u razvoj i promociju Bosne i Hercegovine;
- i) briga o građanima kojim je potrebna posebna pažnja i briga zbog njihovog socijalnog, zdravstvenog i ekonomskog stanja, starosti, iznemoglosti, radne nesposobnosti ili sličnih razloga;
- j) razvoj ekonomski prihvatljivog sistema obrazovanja po svjetskim standardima;
- k) razvoj kvalitetnog sistema zdravstvene zaštite stanovništva;
- l) razvoj svijesti i rad na očuvanju okoline i prirodnih resursa za današnje i buduće generacije,
- m) razvoj svijesti o značaju energetske efikasnosti i prednostima njenog korištenja;
- n) razvoj i unapređenje naučno-istraživačkog rada;
- o) uvažavanje i briga za osobe zaslužne za očuvanje suvereniteta i teritorijalnog integriteta Bosne i Hercegovine;
- p) unapređenje sigurnosti i podrška policijskim, sigurnosnim i vojnim strukturama u Bosni i Hercegovini;
- q) razvoj i promocija svih aktivnosti koje za cilj imaju jačanje Bosne i Hercegovine i slobodu, jednakost i prosperitet svih njenih građana u zemlji i inostranstvu;
- r) ostali ciljevi i zadaci u skladu sa Programom i odlukama Platforme.

**Član 7.**  
**(Ostvarivanje ciljeva)**

Svoje programske ciljeve Platforma ostvaruje na osnovama i principima parlamentarne demokratije, učešćem u organima vlasti ili opozicionim djelovanjem, odgovornim i transparentnim odnosom prema javnosti i drugim oblicima parlamentarnog i vanparlamentarnog djelovanja.

**Član 8.**  
**(Članstvo)**

- (1) Članstvo u Platformi je dobrovoljno.
- (2) Članom Platforme može da postane svako ko prihvata Program, Etički kodeks i Statut Platforme.
- (3) Članstvo u Platformi važi od dana ispunjavanja pristupnice na službenoj web stranici Platforme ili u prostorijama Platforme.
- (4) Predsjedništvo Platforme donosi Pravilnik o članstvu, kojim se detaljnije uređuju i definišu sva pitanja vezana za članstvo, članarinu, način vođenje registra članova, izgled i sadržaj pristupnice i iskaznice, kao i druga pitanja u vezi sa članstvom koja nisu utvrđena ovim statutom.

**Član 9.**  
**(Prava članova)**

Član Platforme ima pravo da:

- a) učestvuje u kreiranju i ostvarivanju politike Platforme;
- b) istakne kandidaturu i bude biran u organe Platforme, ukoliko ispunjava formalne i pravne kriterije, te nije član bilo koje druge političke organizacije;
- c) da se kandiduje za sve funkcije u Platformi, u skladu sa procedurama utvrđenim u pravilima izbornog postupka koje donosi Predsjedništvo Platforme i/ili su utvrđena ovim Statutom;
- d) bude izabran kao kandidat za predstavničke i izvršne organe vlasti na svim nivoima unutar Bosne i Hercegovine, ukoliko ispunjava formalne i pravne kriterije, te nije član bilo koje druge političke organizacije;
- e) bude informisan o aktivnostima Platforme;
- f) slobodno izražava svoja mišljenja i gledišta, te ravnopravno učestvuje u aktivnostima Platforme;
- g) ostvaruje i druga prava u skladu sa ovim statutom i drugim aktima Platforme.

**Član 10.**  
**(Obaveze članova)**

Član Platforme ima obavezu da:

- a) se pridržava odredbi Statuta, Programa i Etičkog kodeksa Platforme;

- b) se zalaže i aktivno radi na ostvarivanju programskih ciljeva Platforme;
- c) savjesno i blagovremeno obavlja svoja zaduženja i obaveze u okviru tijela u koje je imenovan;
- d) čuva i jača ugled Platforme;
- e) promoviše Platformu, te pokreće i učestvuje u aktivnostima Platforme;
- f) aktivnim angažmanom u izbornoj kampanji doprinosi uspjehu Platforme na izborima;
- g) redovno plaća članarinu, u skladu sa utvrđenim pravilima Platforme;
- h) obavlja i druge obaveze u skladu sa Statutom i drugim aktima Platforme.

**Član 11.**  
**(Prestanak članstva)**

(1) Članstvo u Platformi prestaje:

- a) istupanjem iz članstva;
- b) isključenjem iz članstva;
- c) po automatizmu, bez prava na žalbu;
- d) smrću člana.

(2) Član istupa iz Platforme podnošenjem pisanog zahtjeva o istupanju iz članstva Platforme, na osnovu kojeg se briše iz evidencije članova Platforme.

(3) Član Platforme se iz članstva isključuje ispunjenjem uslova i na način utvrđen Pravilnikom iz člana 8. stav (4).

(4) Članstvo u Platformi prestaje po automatizmu članu:

- a) koji se kandiduje na listi druge političke organizacije ili kao nezavisni kandidat bez obzira na ostvareni rezultat;
- b) koji se kandiduje na listi Platforme i osvoji mandat u bilo kojem organu na bilo kojem nivou vlasti u Bosni i Hercegovini pa se samoinicijativno proglaši samostalnim;
- c) istupi iz poslaničkog/viječničkog kluba Platforme;

- d) protiv kojeg je donesena pravosnažna sudska presuda kojim se oglašava krivim u krivičnom postupku.

**Član 12.**  
**(Isključenje članova Predsjedništva Platforme, Nadzornog odbora i Suda časti Platforme)**

- (1) Za predsjednika i/ili potpredsjednika Platforme, članove Predsjedništva Platforme, Nadzornog odbora Platforme i članove Suda časti, odluku o isključenju i brisanju iz evidencije članova Platforme donosi Kongres odnosno Konvencija Platforme.
- (2) Ukoliko je donesena odluka od strane Kongresa odnosno Konvencije Platforme o isključenju i brisanju iz evidencije članstva Platforme, osobama navedenim u stavu (1) ovog člana, isti mogu podnijeti žalbu Sudu časti Platforme u roku od 15 dana od dana prijema odluke o isključenju.
- (3) Odluka Suda časti Platforme je konačna.

- (4) Predsjedništvo Platforme u slučaju brisanja iz evidencije predsjednika, potpredsjednika Predsjedništva Platforme odnosno Nadzornog odbora Platforme imenuje vršioca dužnosti na upražnjenu funkciju od preostalih članova Predsjedništva Platforme odnosno Nadzornog odbora Platforme, do održavanja prvog narednog Kongresa, odnosno Konvencije Platforme.

**Član 13.**  
**(Mirovanje članstva)**

Članu Platforme protiv kojeg se vodi krivični postupak od strane nadležnog suda, članstvo u Platformi miruje i isti ne može da bude kandidat za bilo koju funkciju na svim nivoima vlasti u Bosni i Hercegovini, niti može da bude kandidat na izbornim listama Platforme, sve dok se ne doneše pravosnažna oslobođajuća presuda.

**Član 14.**  
**(Dualizam funkcija)**

- (1) Član Platforme može obnašati samo jednu stranačku funkciju.
- (2) Ukoliko je član Platforme izabrani nosilac funkcije, pa je u toku mandata izabran na drugu funkciju na nivou Platforme, dužan je da u roku od sedam dana od dana izbora na novu funkciju odluči koju funkciju zadržava.
- (3) Ukoliko član Platforme u roku iz stava (2) ovog člana ne obavjesti nadležnu službu Platforme o svojoj odluci, smatra se da je izabrao posljednju stranačku funkciju na koju je izabran i pokreće se postupak za njegovo razrješenje sa ranije funkcije.

**Član 15.**  
**(Disciplinski postupak)**

- (1) Protiv člana Platforme čije je ponašanje i djelovanje usmjereni protiv odluka organa Platforme ili koji nečasnim djelima ili postupcima krši Statut, djeluje suprotno Programu i ciljevima Platforme, te tako šteti ugledu Platforme, provodi se disciplinski postupak.
- (2) Inicijativu za pokretanje disciplinskog postupka protiv člana Platforme koji ispunjava uslove iz stava (1) ovog člana, može podnijeti svaki kolektivni organ Platforme.
- (3) Ukoliko Predsjedništvo Platforme utvrdi da postoji osnovanost navoda iz disciplinske prijave, donijet će odluku o formiranju disciplinske komisije.
- (4) Disciplinska komisija će provesti postupak radi utvrđivanja disciplinske odgovornosti i pripremiti prijedlog odluke koji dostavlja Predsjedništvu Platforme.
- (5) Odluku o disciplinskoj odgovornosti i izvršenom disciplinskom prekršaju donosi Predsjedništvo Platforme, koje može izreći sljedeće mjere:
  - a) pisanu opomenu;
  - b) javnu opomenu sa kojom se upoznaje organ Platforme protiv čijeg člana je izrečena disciplinska mjera;
  - c) isključenje iz Platforme.
- (6) Sva pitanja u vezi pokretanja i provođenja disciplinskog postupka uređuju se Pravilnikom o disciplinskoj odgovornosti članova Platforme kojeg donosi Predsjedništvo Platforme.

**DIO ČETVRTI - ORGANIZACIONA STRUKTURA I PREDSTAVLJANJE PLATFORME**

**Član 16.**  
**(Opća načela organizacije)**

- (1) Platforma, kao jedinstvena politička organizacija, obuhvata cijelokupno članstvo i sve organizacione oblike Platforme u Bosni i Hercegovini i dijaspori.
- (2) Odluku o formiranju ogrankaka Platforme u dijaspori donosi Predsjedništvo Platforme u skladu sa zakonskim i podzakonskim aktima tih zemalja.

**Član 17.**  
**(Predstavljanje i zastupanje)**

- (1) U skladu s ovlaštenjima utvrđenim u ovom statutu, Platformu u istom kapacitetu predstavlja i zastupa predsjednik Platforme koji se upisuje u sudski registar kao lice ovlašteno za zastupanje i predstavljanje političke organizacije.

- (2) Prvi predsjednik Platforme ujedno je i njen počasni predsjednik.
- (3) Predsjednik Platforme je po svojoj funkciji predsjednik Predsjedništva Platforme.
- (4) Kada predsjednik Platforme nije u mogućnosti da obavlja dužnost iz stava (1) ovog člana, Platformu u okviru istih ovlaštenja predstavlja i zastupa potpredsjednik Platforme, a na osnovu pismenog ovlaštenja predsjednika Platforme.

**Član 18.**  
**(Organi Platfome)**

(1) Organi Platforme su:

a) Na nivou Bosne i Hercegovine:

- 1) Kongres;
- 2) Konvencija;
- 3) Predsjedništvo;
- 4) Predsjednik Platforme;
- 5) Nadzorni odbor;
- 6) Izvršni direktor;
- 7) Sud časti;
- 8) Izborni štab.

b) Na nivou regije:

- 1) Regionalna skupština;
- 2) Regionalni odbor;
- 3) Predsjednik regionalnog odbora;
- 4) Stručni odbor;
- 5) Izvršni direktor;
- 6) Izborni štab.

c) Na nivou općine/grada:

- 1) Općinska/gradska skupština;
- 2) Općinski/gradski odbor;
- 3) Predsjednik općinskog/gradskog odbora;
- 4) Stručni odbor;
- 5) Izvršni direktor;
- 6) Izborni štab.

d) Na nivou mjesne zajednice:

- 1) Skupština mjesne zajednice i
- 2) Mjesni odbor

e) Regionalna predstavništva u dijaspori:

- 1) Predsjednik Regionalne organizacije regije Dijaspora;
- 2) Regionalna skupština;
- 3) Regionalni odbor;
- 4) Stručni odbor;
- 5) Izvršni direktor;
- 6) Izborni štab

(2) Svi organi se međusobno izvještavaju o radu kako bi njihov rad bio transparentan.

**Član 19.**  
**(Tijela Platforme)**

(1) Stalna radna tijela na nivou Platforme su:

- a) Ekspertni savjeti;
- b) Tehničke komisije;
- c) Akademija Platfome;
- d) Asocijacije;
- e) Povjereništva.

(2) Predsjedništvo Platforme donosi odluku o načinu formiranja i djelovanju tijela Platforme.

(3) Predsjedništvo može, kada se za tim ukaže potreba, donijeti odluku o formiranju i drugih tijela Platforme.

(4) Tijela na nivou regija i općina/gradova su stručne komisije, timovi i slično.

**Član 20.**  
**(Glasanje)**

(1) Glasanje u organima i tijelima na nivou Platforme i svim organima teritorijalnih organizacija u pravilu je javno, ali o određenim pitanjima može da se glasa tajno. Poslovniči o radu tih organa i tijela određuju o kojim pitanjima članstvo glasa tajno.

(2) Poslovnici iz stava (1) ovog člana može da se utvrdi i način glasanja elektronskim putem radi učešća u glasanju članova čije fizičko prisustvo ne može da se osigura.

**Član 21.**  
**(Mandat članova izabranih u organe Platforme)**

Članovi svih izabranih organa i tijela Platforme i članovi izabrani da njima rukovode biraju se na period od četiri godine, uz mogućnost ponovnog izbora, ali ne više od osam godina uzastopno, ako Statutom nije drugačije predviđeno.

**POGLAVLJE I – ORGANI PLATFORME NA NIVOU BOSNE I HERCEGOVINE**

**Odjeljak A. Kongres**

**Član 22.**  
**(Kongres)**

(1) Najviši organ Platforme je Kongres Platforme.

(2) Kongres Platforme, po svom karakteru i sadržaju, može biti redovni (izborni, izborne-izvještajni ili izvještajno tematski) i vanredni (izborni, izborne-izvještajni ili izvještajno tematski).

(3) Redovni Kongres održava se svake četiri godine.

(4) Izvještajno-tematski Kongres održava se prema potrebi, najmanje jednom godišenje, a obavezno u roku od šest mjeseci od dana objavljivanja službenih rezultata izbora održanih u Bosni i Hercegovini.

(5) Na izvještajno-tematskom Kongresu predstavlja se izvještaj o radu za period od prethodnog održanog Kongresa, podnose se finansijski izvještaji i donosi plan i program rada za narednu godinu.

(6) Vanredni Kongres održava se na osnovu odluke Predsjedništva Platforme.

(7) Odredbe ovog statuta kojim se uređuje način sazivanja Kongresa, izbor delegata, rad i odlučivanje na Kongresu Platforme, odnose se na sve kongrese navedene u stavu (2) ovog člana.

(8) Predsjedništvo Platforme može da doneše odluku o skraćivanju rokova za pripremu i organizaciju vanrednog Kongresa propisanih ovim statutom.

**Član 23.**  
**(Sazivanje Kongresa)**

(1) Kongres Platforme saziva predsjednik Platforme, na inicijativu Predsjedništva Platforme.

(2) Organ iz stava (1) ovog člana donosi odluku o sazivanju Kongresa, koja obavezno sadrži:

- a) datum, vrijeme i mjesto održavanja Kongresa;
- b) broj delegata Kongresa i način njihovog izbora;
- c) sastav odbora za organizaciju Kongresa;
- d) naznaku bitnih pitanja koja će Kongres razmatrati u toku zasjedanja.

(3) Akti iz stava (2) ovog člana dostavljaju se regionalnim, gradskim, općinskim i mjesnim odborima, Odboru za organizaciju Kongresa, Izbornom štabu i Predsjedništvu Platforme, a najkasnije 30 dana prije zakazanog datuma za održavanje Kongresa.

(4) Poziv i materijali za Kongres dostavljaju se najmanje 15 dana prije zakazanog dana održavanja izbornog Kongresa, a najmanje pet dana prije zakazanog datuma održavanja izvještajno-tematskog ili vanrednog Kongresa.

**Član 24.**  
**(Sazivanje vanrednog Kongesa)**

(1) Zahtjev za održavanjem vanrednog Kongresa podnosi se Predsjedništvu Platforme.

(2) Na osnovu odluke Predsjedništva, a na zahtjev najmanje tri regionalna odbora ili najmanje deset općinskih odbora, predsjednik Platforme dužan je sazvati vanredni Kongres.

(3) Izuzetno od stava (2) ovog člana, ako je u pitanju sazivanje vanrednog izbornog Kongresa, dovoljna je samo odluka Predsjedništva Platforme.

(4) Obrazloženi zahtjev iz stava (2) ovog člana podnosi se u pisanim obliku i sadrži prijedlog dnevnog reda vanrednog Kongresa.

(5) Kada Predsjedništvo Platforme zaprimi zahtjev za sazivanjem vanrednog Kongresa, dužno je da u roku od deset dana razmotri opravdanost razloga za sazivanjem vanrednog Kongresa, te o svom konačnom stavu obavijesti podnosioce zahtjeva.

(6) Ako Predsjedništvo Platforme prihvati zahtjev za sazivanje vanrednog Kongresa, u odluci o sazivanju vanrednog Kongresa određuje i vrstu kongresa u skladu sa članom 22. stav (2) Statuta.

(7) Ukoliko Predsjedništvo Platforme ne prihvati zahtjev za sazivanje vanrednog Kongresa, donosi odluku sa obrazloženjem o svom stavu. Navedenu odluku dužno je u roku od 30 dana od dana podnošenja zahtjeva dostaviti podnosiocima zahtjeva.

**Član 25.**  
**(Sazivanje vanrednog Kongresa od strane Predsjednika Platforme)**

Predsjednik Platforme, bez čekanja odobrenja Predsjedništva Platforme ili zahtjeva regionalnih ili općinskih odbora, u smislu člana 24. stav (2), može da sazove Kongres ako sam procijeni da je neophodno njegovo održavanje.

**Član 26.**  
**(Sastav Kongresa Platforme)**

(1) Kongres čine:

- a) predsjednik Kongresa, s pravom glasa;

- b) potpredsjednik Kongresa, s pravom glasa;
  - c) predstavnici iz svih šest regionalnih organizacija navedenih u članu 50. stav (2), s pravom glasa,
  - d) predstavnici iz dijaspore, s pravom glasa;
  - e) predsjednik Platforme, bez prava glasa;
  - f) članovi Predsjedništva koji su pozvani da prisustvuju, ali bez prava glasa;
- (2) Mandat delegata iz stava (1) ovog člana traje četiri godine, odnosno do narednog izbornog Kongresa.
- (3) Predsjedništvo Platforme donosi pravilnik kojim se utvrđuje broj delegata, način izbora delegata i kriteriji za izbor delegata Kongresa.

**Član 27.**  
**(Nadležnosti Kongresa)**

Kongres je nadležan da:

- 1) donosi Statut i Program;
- 2) donosi Poslovnik o radu;
- 3) vrši izmjene i dopune Statuta i Poslovnika o radu;
- 4) donosi odluke, deklaracije i druge akte iz svoje nadležnosti;
- 5) raspravlja i donosi odluku o prestanku rada Platforme ili njenom udruživanju s drugim političkim organizacijama;
- 6) utvrđuje opštu politiku, smjernice i stajališta Platforme;
- 7) razmatra i ocjenjuje cjelokupno djelovanje Platforme;
- 8) razmatra i ocjenjuje rad organa Platforme između dva Kongresa;
- 9) bira i razrješava predsjednika Kongresa;
- 10) bira i razrješava potpredsjednika Kongresa;
- 11) bira i razrješava zapisničara Kongresa;
- 12) bira i razrješava predsjednika Platforme;

- 13) bira i razrješava potpredsjednika Platforme;
- 14) bira i razrješava članove Predsjedništva Platforme;
- 15) bira i razrješava članove Nadzornog odbora Platforme;
- 16) bira i razrješava članove Suda časti Platforme;
- 17) obavlja i druge poslove utvrđene Poslovnikom o radu i Statutom.

**Član 28.**  
**(Predsjedavanje Kongresom)**

- (1) Kongresom predsjedava predsjednik Kongresa, koji se bira na početku svakog izbornog Kongresa.
- (2) Predsjedniku u vođenju Kongresa pomažu potpredsjednik i zapisničar, koji se biraju na početku svakog izbornog Kongresa.
- (3) Osobe iz st. (1) i (2) ovog člana ne mogu se birati više od dva uzastopna mandata.
- (4) Predsjedništvo Platforme sačinjava prijedlog Poslovnika o radu Kongresa kojeg usvaja Kongres.
- (5) Sve odredbe o radu i nadležnosti izbornog kongresa, primjenjuju se na i izvještajni kongres.

**Član 29.**  
**(Način odlučivanja na Kongresu)**

- (1) Kongres donosi pravovaljane odluke ako zasjedanju prisustvuje natpolovična većina izabranih delegata.
- (2) Kongres donosi pravovaljane odluke natpolovičnom većinom prisutnih delegata.
- (3) Prisustvo delegata osigurava se i elektronskim putem.
- (4) Odluku o prestanku rada, spajanju s drugim političkim organizacijama, stupanju u međunarodna politička i nepolitička udruženja i izmjenama i dopunama Statuta Platforme, Kongres donosi dvotrećinskom većinom svih delegata Kongresa.
- (5) Ukoliko se glasa o više prijedloga koji se međusobno isključuju, usvojenim se smatra onaj prijedlog koji je dobio najviše glasova delegata Kongresa.
- (6) Delegati Kongresa predstavljaju stavove članstva iz regionalne organizacije koju predstavljaju na Kongresu.

**Član 30.**  
**(Konvencija)**

- (1) Kada iz nekog razloga (vanredne okolnosti i sl.) nije moguće održati redovni kongres, saziva se Konvencija Platforme.
- (2) Konvencija se može sazvati i radi izbora u organe Platforme ukoliko je iz nekog razloga ostalo upražnjeno neko mjesto u tom organu.

**Član 31.**  
**(Sastav, sazivanje i rad Konvencije)**

- (1) Konvenciju čine predsjednici organa Platforme i određeni broj izabralih delegata, o čemu odluku donosi Predsjedništvo Platforme.
- (2) Sazivanje, način rada i donošenje odluka Konvencije provodi se na način utvrđen u čl. 23., 28. i 29. Statuta za sazivanje, rad i odlučivanju na Kongresu.
- (3) Konvencija ima sva ovlašćenja Kongresa utvrđena u članu 27. Statuta.

**Odjeljak C. Predsjedništvo Platforme**

**Član 32.**  
**(Sastav Predsjedništva Platforme)**

- (1) Predsjedništvo Platforme je najviši organ Platforme u periodu između dva Kongresa.
- (2) Predsjedništvo Platforme broji 15 članova s pravom glasa.
- (3) Predsjedništvo Platforme čine:
  - a) predsjednik Platforme, s pravom glasa;
  - b) potpredsjednik Platforme, s pravom glasa;
  - c) šest predsjednika regionalnih odbora u Bosni i Hercegovini, s pravom glasa;
  - d) predsjednik Regionalne organizacije Regije Dijaspore, s pravom glasa;
  - e) tri predstavnika mladih, s pravom glasa;
  - f) jedan predstavnik dijaspore, s pravom glasa;
  - g) dva predstavnika manje rodno zastupljenih članova.

(4) Pri sastavljanju izbornih lista za Predsjedništvo Platforme ulaze se maksimalan napor da se obezbjedi takav sastav Predsjedništva Platforme u kojem:

- a) su ravnopravno zastupljena oba spola,
- b) je zastupljeno najmanje 50% članova mlađih od 40 godina, i
- c) su ravnopravno zastupljeni svi građani Bosne i Hercegovine i dijaspore.

(5) U slučaju da članu Predsjedništva iz bilo kog razloga prestane mandat, novog člana bira Predsjedništvo Platforme, sa liste kandidata za Predsjedništvo, prema broju osvojenih glasova.

(6) Na sjednice Predsjedništva Platforme obavezno se pozivaju da prisustvuju, bez prava glasa, predsjednik Kongresa, predsjednik Nadzornog odbora i izvršni direktor Platforme.

**Član 33.**  
**(Konstituisanje Predsjedništva)**

(1) Predsjedništvo Platforme se konstituira u skladu sa Statutom najkasnije u roku od 30 dana od dana održavanja Kongresa na kojem je izabran novi, djelimično izmijenjen ili dopunjeno postojeći saziv Predsjedništva Platforme.

(2) Konstituirajuću sjednicu novoizabranoj Predsjedništvo Platforme saziva predsjednik Platforme.

**Član 34.**  
**(Sazivanje i predsjedavanje sjednicom Predsjedništva Platforme)**

(1) Predsjedništvo Platforme zasjeda najmanje četiri puta godišnje.

(2) Sjednice Predsjedništva Platforme saziva predsjednik Platforme, a u slučaju njegove spriječenosti, potpredsjednik Platforme.

(3) Predsjednik Platforme dužan je da sazove sjednicu Predsjedništva Platforme na prijedlog najmanje četiri člana Predsjedništva Platforme.

(4) Ako predsjednik Platforme ne sazove sjednicu u skladu sa stavom (3) ovog člana, potpredsjednik Platforme saziva sjednicu Predsjedništva bez odgađanja.

(5) Sjednicom Predsjedništva predsjedava predsjednik Platforme, a u slučaju njegove spriječenosti, zamjenjuje ga potpredsjednik Platforme, koji ima sva ovlašćenja predsjednika, u vezi sa održavanjem sjednice kojom predsjedava.

**Član 35.**  
**(Nadležnosti Predsjedništva Platforme)**

Predsjedništvo Platforme je nadležno da:

- a) odgovara za provođenje odluka Kongresa Platforme i politika Platforme;
- b) donosi odluke i zaključke, te daje preporuke i smjernice predsjedniku Platforme;
- c) razmatra i predlaže načine povezivanja i saradnje Platforme s drugim političkim ili nepolitičkim organizacijama, te donosi, između dva Kongresa Platforme, odluku o udruživanju sa drugim političkim organizacijama koja važi do konačne odluke Kongresa Platforme o ovom pitanju;
- d) raspravlja i odlučuje o koalicijama Platforme;
- e) donosi odluku o pristupanju međunarodnim političkim asocijacijama;
- f) donosi odluku o postupku kandidovanja i izboru kandidata za lokalne i opšte izbore;
- g) utvrđuje kandidate za sve nivoe vlasti i potvrđuje konačne kandidatske liste za sve nivoe vlasti u Bosni i Hercegovini;
- h) donosi odluku o načinu formiranja i djelovanja tijela Platforme;
- i) uspostavlja privremene odbore u regionalnim organizacijama do izbora odbora u skladu sa Statutom ili u slučajevima da ih Predsjedništvo razriješi kao i u slučajevima potrebe prema odredbama Statuta;
- j) zauzima politička stajališta o pitanjima iz djelokruga zakonodavnih i izvršnih organa Bosne i Hercegovine, Federacije Bosne i Hercegovine, Republike Srpske i Brčko Distrikta BiH;
- k) imenuje privremene vršioce dužnosti predsjednika i potpredsjednika Platforme, iz reda članova Predsjedništva, kada im iz bilo kojeg razloga prestane mandat;
- l) utvrđuje kandidate za izbor u organe Platforme koje bira Kongres Platforme;
- m) na prijedlog predsjednika Platforme donosi finansijski plan i usvaja konačan finansijski izvještaj Platforme za prethodnu godinu;
- n) analizira i ocjenjuje vođenje predizborne kampanje, aktivnosti Platforme u kampanji i rezultate izbora na svim nivoima vlasti;

- o) na zajedničkim sastancima, a najmanje dvaput godišnje, analizira rad poslanika Platforme u predstavničkim organima Bosne i Hercegovine, Federacije Bosne i Hercegovine, Republike Srpske i Brčko Distrikta BiH;
- p) raspravlja o svim pitanjima vezanim za djelovanje Platforme, te utvrđuje programske smjernice za pojedina područja političkog, ekonomskog i društvenog života;
- q) imenuje i ovlašćuje izvršnog direktora da nadzire rad operativnih službi Platforme, uključujući finansijsku, pravnu, tehničku, logističku, analitičku, marketinšku, službu za odnose s javnošću i sve druge službe koje se tokom vremena razviju unutar Platforme;
- r) donosi Pravilnik o postupku kandidovanja i izboru članova u organe Platforme;
- s) donosi Pravilnik o članstvu;
- t) donosi Poslovnik o radu Predsjedništva Platforme;
- u) donosi Pravilnik o disciplinskoj odgovornosti članova Platforme;
- v) donosi Etički kodeks;
- w) donosi i druge opće akte utvrđene ovim statutom;
- x) donosi i druge odluke, rješenja, sporazume, pravilnike, stavove, uputstva, smjernice, kao i druge akte koje su neophodne za nesmetan rad Platforme, a čije doношење nije u nadležnosti drugih organa Platforme;
- y) obavlja i sve druge poslove predviđene Poslovnikom o radu Predsjedništva Platforme i Statutom.

**Član 36.**  
**(Glasanje u Predsjedništvu Platforme)**

- (1) Predsjedništvo Platforme donosi pravovaljane odluke natpolovičnom većinom prisutnih članova, ako sjednici prisustvuju najmanje dvije trećine ukupnog broja članova Predsjedništva Platforme.
- (2) Odluke Predsjedništva Platforme su obavezujuće za sve niže organe i tijela Platforme koja su dužna da ih provode bez odlaganja.

**Odjeljak D. Predsjednik Platforme**

**Član 37.**  
**(Predsjednik Platforme)**

- (1) Predsjednik Platforme zastupa i predstavlja Platformu, te neposredno rukovodi aktivnostima na provođenju politika i programa Platforme, izvršavanjem i provođenjem odluka nadležnih organa Platforme, te odlučuje o tekućim poslovima vezanim za neposredno upravljanje Platformom.
- (2) Predsjednik Platforme može da ovlasti člana pojedinog organa ili tijela Platforme da predstavlja i zastupa Platformu u određenim poslovima i aktivnostima (npr. učešće na: konferencijama, seminarima, okruglim stolovima, pregovorima oko pitanja koja su od važnosti za Platformu i slično).

**Član 38.**  
**(Izbor predsjednika Platforme)**

- (1) Predsjednik Platforme bira se neposredno na Kongresu i za svoj rad odgovara Kongresu Platforme i Predsjedništvu Platforme između dva Kongresa.
- (2) Način kandidovanja i izbora predsjednika Platforme utvrđen je Pravilnikom o postupku kandidovanja i izboru organa Platforme.

**Član 39.**  
**(Mandat predsjednika Platforme)**

- (1) Mandat predsjednika Platforme traje četiri godine uz mogućnost ponovnog izbora, a ne više od osam godina uzastopno.
- (2) U slučaju da Platforma na lokalnim ili općim izborima ostvari slabije rezultate u odnosu na prethodne izbore na tim nivoima vlasti, predsjednik Platforme je dužan da ponudi ostavku o kojoj odlučuje Kongres Platforme.
- (3) U slučaju da predsjednik Platforme u roku od 30 dana od dana objave konačnih rezultata ne ponudi ostavku, Predsjedništvo Platforme je dužno da u roku od 30 dana otvori pitanje povjerenja predsjedniku Platforme.
- (4) Konačnu odluku o pitanju povjerenja donosi Sud časti.
- (5) U slučaju da predsjednik Platforme iz bilo kojeg razloga prestane da obavlja svoju funkciju, potpredsjednik Platforme obavlja dužnosti predsjednika Platforme do narednog Kongresa Platforme.

**Član 40.**  
**(Ovlaštenja Predsjednika Platforme)**

Predsjednik Platforme ovlašten je da:

- a) provodi politiku Platforme u skladu s programskim dokumentima, Statutom, odlukama i zaključcima nadležnih organa Platforme, te donosi izvršne političke odluke, zaključke, upustva i druge akte;
- b) osigurava međusobnu saradnju i koordinaciju svih organa i tijela Platforme;
- c) odgovara zajedno sa Predsjedništvom Platforme da finansijsko poslovanje Platforme bude u skladu sa zakonima Bosne i Hercegovine;
- d) saziva Kongres Platforme, u skladu sa Statutom;
- e) saziva Predsjedništvo Platforme;
- f) potvrđuje formiranje regionalnih i lokalnih odbora na inicijativu članova na način utvrđen ovim Statutom;
- g) predlaže Predsjedništvu Platforme donošenje odluke o raspuštanju lokalnih i regionalnih odbora Platforme;
- h) obavlja i druge poslove u skladu sa Statutom.

**Odjeljak E. Nadzorni odbor Platforme**

**Član 41.**  
**(Nadzorni odbor Platforme)**

- (1) Nadzorni odbor Platforme ima pet članova, koje u skladu sa ovim statutom, bira Kongres na mandat od četiri godine.
- (2) Nakon izbora članova Nadzornog odbora Platforme, predsjednik Platforme saziva konstituirajuću sjednicu Nadzornog odbora Platforme na kojoj članovi između sebe biraju predsjednika Nadzornog odbora Platforme i donose Poslovnik o radu Nadzornog odbora, u skladu sa Statutom.
- (3) Konvencija Platforme može, između dva Kongresa, zamijeniti neaktivnog člana Nadzornog odbora Platforme ili člana kojem je iz bilo kog razloga prestao mandat.
- (4) Nadzorni odbor Platforme za svoj rad odgovara Kongresu Platforme.
- (5) Članovi Nadzornog odbora Platforme ne mogu da budu članovi Predsjedništva Platforme niti delegati Kongresa

**Član 42.**  
**(Nadležnost Nadzornog odbora)**

- (1) Nadzorni odbor Platforme nadzire zakonitost i statutarnost rada svih organa i tijela Platforme, a naročito njihovo materijalno-finansijsko poslovanje.
- (2) Nadzorni odbor Platforme donosi pravovaljane odluke većinom glasova svojih članova.
- (3) Nadzorni odbor Platforme obavezno daje mišljenje o svakom izvještaju o materijalno-finansijskom poslovanju koji se podnosi Predsjedništvu Platforme ili Kongresu Platforme.
- (4) U slučaju uočenih nepravilnosti u radu, u smislu stava (3) ovog člana, Nadzorni odbor Platforme bez odgađanja i u pismenom obliku, obavještava predsjednika Platforme i Predsjedništvo Platforme, te poziva organ ili tijelo u čijem radu su uočene nepravilnosti da ih bez odgađanja ispravi.
- (5) Nadzorni odbor se sastaje redovno svakih šest mjeseci, a po potrebi i češće.

**Odjeljak F. Izvršni direktor**

**Član 43.**  
**(Izvršni direktor)**

- (1) Izvršnog direktora Platforme bira Predsjedništvo na prijedlog predsjednika Platforme.
- (2) Izvršni direktor za svoj rad odgovara Predsjedništvu Platforme.

**Član 44.**  
**(Nadležnosti izvršnog direktora)**

- (1) Nadležnosti izvršnog direktora su:
  - a) organizira i koordinira rad organa i radnih tijela Platforme;
  - b) odgovoran je za izvršenje odluka predsjednika Platforme, Predsjedništva Platforme i Nadzornog odbora Platforme;
  - c) odgovoran je za provođenje Statuta i drugih odluka organa i radnih tijela Platforme;
  - d) učestvuje u pripremi i radu organa i radnih tijela Platforme, te priprema i osigurava organizacione, materijalne i tehničke uslove za njihov rad;
  - e) organizira i koordinira poslovanje Platforme, naročito materijalno-finansijsko poslovanje;

- f) dužan je, u slučaju uočene potrebe, pismeno ukazati bilo kojem organu ili radnom tijelu Platforme da postupa suprotno odredbama Statuta, drugim općim aktima ili odlukama organa Platforme;
  - g) obavlja i druge poslove u skladu sa odredbama Statuta i odlukama organa Platforme.
- (2) Izvršni direktor može, uz prethodnu saglasnost Predsjedništva Platforme, sazvati sjednicu bilo kojeg organa Platforme ukoliko ocijeni da je sazivanje sjednice neophodno.
- (3) U slučaju duže odsutnosti izvršnog direktora, Predsjedništvo Platforme imenuje između svojih članova osobu koja će obavljati poslove izvršnog direktora za vrijeme njegove odsutnosti.

**Odjeljak G. Sud časti**

**Član 45.**  
**(Izbor članova Suda časti)**

- (1) Kongres bira pet članova Suda časti iz reda članova Platforme, koji su svojim djelovanjem dali značajan doprinos afirmaciji društvenih i moralnih vrijednosti.
- (2) Sud časti iz stava (1) ovog člana sastavljen je od tri stalna člana i dva povremena člana.
- (3) Povremeni članovi obavezno posjeduju stručne kvalifikacije u oblasti vezanoj za tematiku o kojoj se raspravlja u određenom slučaju.
- (4) Predsjednika Suda časti biraju članovi Suda časti.
- (5) Članovi Suda časti ne mogu ujedno biti članovi drugih organa Platforme.

**Član 46.**  
**(Nadležnosti Suda časti)**

- (1) Predsjedništvo Platforme donosi Etički kodeks na prijedlog Suda časti koji je zadužen da nadzire njegovo provođenje.
- (2) Sud časti djeluje u skladu sa Etičkim kodeksom.
- (3) Svi članovi izabrani u organe i tijela Platforme dužni su da se upoznaju sa sadržajem Etičkog kodeksa i da ga u cijelosti primjenjuju. Isti dokument dužni su da potpišu i svi članovi koji budu na listama Platforme ili su na bilo koji način njeni predstavnici.
- (4) Nepoštivanje Etičkog kodeksa za rezultat ima isključenje iz članstva Platforme.

(5) Način rada Suda časti Platforme uređuje se Poslovnikom o radu kojeg donose članovi Suda časti.

(6) Predsjednik Suda časti se po potrebi poziva na sjednice Predsjedništva Platforme.

**Odjeljak H. Izborni štab**

**Član 47.**  
**(Imenovanje članova Izbornog štaba)**

(1) Predsjedništvo Platforme, na nivou Bosne i Hercegovine, imenuje članove izbornog štaba.

(2) Na prijedlog nadležnog odbora, Predsjedništvo Platforme imenuje člana Izbornog štaba dijaspore, regija, općina/gradova i mjesnih zajednica

**Član 48.**  
**(Rad Izbornog štaba)**

Način izbora, broj članova i djelokrug rada Izbornog štaba, utvrđuje se pravilnikom kojeg donosi Predsjedništvo Platforme.

**POGLAVLJE II - TERITORIJALNA ORGANIZACIJA**

**Član 49.**  
**(Teritorijalni princip djelovanja)**

Platforma je organizovana na teritorijalnom principu, odnosno, organizacije Platforme dijele se na regionalne i lokalne organizacije.

**Član 50.**  
**(Regionalna organizacija)**

(1) Regionalne organizacije se dijele na regionalne organizacije unutar Bosne i Hercegovine i na Regionalnu organizaciju Regije Dijaspore. Teritorijalna pripadnost regijama određena je odlukom Predsjedništva Platforme.

(2) Platforma ima šest regionalnih organizacija unutar Bosne i Hercegovine, i to: Bosna, Drina, Neretva, Sava, Una i Vrbas.

(3) Platforma formira Regionalnu organizaciju Dijaspore za svoje članove koji ne žive na teritoriji Bosne i Hercegovine. U svakoj državi u kojoj postoji za to potreba i inicijativa, a u skladu sa pozitivnopravnim propisima države u kojoj se formira, internim pravilnicima se teritorijalno organizuje Odbor za dijasporu.

- (4) Odredbe o osnivanju, statusu i nadležnostima regionalnih odbora Una, Sana, Vrbas, Bosna, Neretva i Drina primjenjuju se i na regionalni odbor u inostranstvu, a donosi ih Predsjedništvo Platforme.
- (5) Odredbe o osnivanju, statusu i nadležnostima gradskih /općinskih odbora u Bosni i Hercegovini primjenjuju se na iste odbore izvan Bosne i Hercegovine, a u skladu sa pozitivnopravnim propisima države u kojoj se osnivaju.

**Član 51.**  
**(Lokalna organizacija)**

- (1) Lokalne organizacije se dijele na općinske/gradske i mjesne organizacije.
- (2) Općinska/gradska organizacija Platforme je osnovna organizaciona jedinica Platforme koja se osniva za područje jedne općine/grada.
- (3) Mjesna organizacija Platforme se formira na području mjesne zajednice.
- (4) Lokalne organizacije djeluju u skladu sa teritorijalnom organizacijom lokalne samouprave.

**Odjeljak A. Regionalna organizacija**

**Član 52.**  
**(Formiranje i djelovanje regionalne organizacije)**

- (1) Predsjedništvo Platforme odlukom formira regionalne organizacije u Bosni i Hercegovini, na incijativu najmanje 20 članova Platforme.
- (2) Regionalna organizacija Regije Dijaspore formira se na inicijativu najmanje 100 članova, u najmanje jednoj zemlji prijema.
- (3) Regionalne organizacije Platforme promovišu ciljeve i načela rada Platforme i djeluju samostalno, u skladu sa Statutom i Programom, kao i odlukama viših organa i tijela Platforme.

**Član 53.**  
**(Izbor kandidata)**

- (1) Regionalna organizacija predlaže kandidate koji će se kandidovati na lokalnim i općim izborima u Bosni i Hercegovini u skladu s ovim statutom i odlukama organa Platforme o postupku kandidovanja.
- (2) U slučaju da regionalna organizacija ne postoji ili da je regionalni odbor raspušten ili da regionalni odbor u datom roku nije izvršio ovu obavezu iz stava (1) ovog člana, Predsjedništvo Platforme sastavlja liste i predlaže kandidate i zamjenike kandidata.

**Pododjeljak A. Organi regionalne organizacije**

**Član 54.**  
**(Predsjednik Regionalne organizacije Regija Dijaspore)**

- (1) Predsjedništvo Platforme imenuje predsjednika Regionalne organizacije Regija Dijaspore na mandatni period Predsjedništva Platforme koje ga je izabralo.
- (2) Nadležnosti predsjednika Regionalne organizacije Regija Dijaspore su:
  - a) zastupa i predstavlja Regionalnu organizaciju Regija Dijaspora, te neposredno rukovodi aktivnostima na provođenju politika i programa Platforme, izvršavanjem i provođenjem odluka nadležnih organa Platforme, te odlučuje o tekućim poslovima vezanim za neposredno upravljanje Regijom Dijaspora;
  - b) uz saglasnost Predsjedništva Platforme donosi izvršne političke odluke, zaključke, upute i druge akte;
  - c) osigurava međusobnu saradnju i koordinaciju svih organa i tijela na nivou Regije Dijaspore;
  - d) na inicijativu članova pojedinih država, razmatra prijedlog i daje svoje mišljenje za formiranje regionalnih odbora na način koji je utvrđen ovim statutom;
  - e) odgovoran je za izvršenje odluka na nivou Regije Dijaspora predsjednika Platforme, Predsjedništva Platforme i Nadzornog odbora Platforme;
  - f) dužan je, u slučaju uočene potrebe, pismeno ukazati bilo kojem organu ili radnom tijelu Regije Dijaspora da postupa supretno odredbama Statuta, općim aktima ili odlukama organa Platforme;
  - g) uz prethodnu saglasnost Predsjedništva Platforme, može sazvati sjednicu bilo kojeg organa Regije Dijaspora ukoliko ocijeni da je sazivanje sjednice neophodno;
  - h) obavlja i druge poslove u skladu sa Statutom i odlukom Predsjedništva o postavljenju na tu funkciju.
- (3) U slučaju duže odsutnosti predsjednika Regionalne organizacije Regija Dijaspore, Predsjedništvo Platforme imenuje između članova u dijaspori osobu koja će obavljati poslove predsjednika Regionalne organizacije Regija Dijaspora za vrijeme njegove odsutnosti.

**Član 55.**  
**(Regionalna skupština)**

- (1) Regionalna skupština može biti izborna, izvještajna i izborne-izvještajna.

- (2) Skupštinu čine svi članovi općinskih/gradskih odbora regija.
- (3) Regionalna izborna skupština tajnim glasanjem i natpolovičnom većinom prisutnih delegata bira predsjednika regionalnog odbora.
- (4) Mandat predsjednika regionalnog odbora je četiri godine.
- (5) Regionalna izvještajna skupština jednom godišnje razmatra i natpolovičnom većinom pristunih delegata usvaja izvještaj o radu regionalnog odbora za prethodnu godinu, te program rada i finansijski plan za tekuću godinu.
- (6) Kvorum za rad regionalne skupštine je dvije trećine od ukupnog broja delegata iz skupštine.
- (7) Kvorum za donošenje odluka regionalne skupštine je natpolovična većina prisutnih delegata koji imaju pravo glasa.

**Član 56.**  
**(Regionalni odbor)**

- (1) Organ Regionalne organizacije je regionalni odbor koji broji najmanje pet članova, pri čemu je ukupan broj članova regionalnog odbora neparan.
- (2) Svaka općinska/gradska organizacija bira najmanje po jednog člana regionalnog odbora.
- (3) Regionalni odbor čine:
  - a) predsjednik;
  - b) potpredsjednik;
  - c) članovi regionalnog odbora koje biraju općinski/gradski odbori u skladu sa Poslovnikom o radu regionalnog odbora.
- (4) Predsjednika i potpredsjednika regionalnog odbora bira regionalna skupština, koja je sastavljena od članova Platforme iz te regije, koji ne mogu biti predsjednici i potpredsjednici općinskih/gradskih odbora u općinama/gradovima u kojim imaju prebivalište.
- (5) Iznimno, na prijedlog predsjednika Platforme, a uz prethodnu saglasnost Predsjedništva Platforme, regionalni odbor može da bira i dodaje do jedne trećine dodatnih članova u odnosu na postojeći broj članova regionalnog odbora.
- (6) U slučaju da iz bilo kojeg razloga nije moguće izvršiti izbor članova regionalnog odbora, Predsjedništvo Platforme imenuje članove regionalnog odbora.

**Član 57.**  
**(Rad regionalnog odbora)**

- (1) Regionalni odbor donosi, u skladu s ovim Statutom, Poslovnik o radu regionalnog odbora.
- (2) Za izvršavanje pojedinih složenih i specifičnih zadataka, regionalni odbor osniva regionalna tijela Platforme u skladu s ovim Statutom i političkim načelima Platforme.
- (3) Regionalni odbor Regije Dijaspore, zbog specifičnosti potreba i rasprostranjenosti članstva u cijelom svijetu, predlaže poseban Poslovnik o svom radu i unutrašnjoj organizaciji i upućuje ga Predsjedništvu Platforme na usvajanje.
- (4) Član regionalnog odbora dužan je da prisustvuju sjednicama regionalnog odbora i aktivno učestvuju u radu radnih tijela Platforme u koje je imenovan kao član ispred regionalnog odbora.

**Član 58.**  
**(Nadležnosti i donošenje odluka regionalnog odbora)**

- (1) U ostvarivanju svoje funkcije regionalni odbor:
  - a) osmišljava i organizuje djelovanje i provođenje politike Platforme, izvršenje programa i programskih načela i ciljeva na nivou regionalne organizacije;
  - b) primjenjuje Statut i provodi odluke nadležnih organa i tijela Platforme;
  - c) daje političke ocjene i utvrđuje političke stavove o stanju na području na kojem djeluje i šire;
  - d) koordinira i usmjerava rad lokalnih organizacija, te podstiče formiranje novih lokalnih organizacija i njihovih ograna, u skladu sa Statutom i odlukama nadležnih organa i tijela Platforme;
  - e) podstiče omasovljenje članstva;
  - f) osniva različite interesne odbore i druga tijela i koordinira njihov rad;
  - g) bira izvršnog direktora regionalnog odbora;
  - h) predlaže kandidate i njihove zamjenike te organizuje i nadzire provođenje izborne kampanje za predstavničke organe regionalne uprave sa područja regionalne organizacije;
  - i) predlaže koalicije na nivou regionalne uprave s područja regionalne organizacije, u skladu s politikom Platforme;

- j) najmanje jednom u šest mjeseci razmatra rad svojih članova u organima regionalne uprave sa područja regionalne organizacije;
- k) predlaže kandidate za izbor poslanika u predstavničke organe Bosne i Hercegovine, entiteta Federacije Bosne i Hercegovine i kantona, entiteta Republike Srpske i i Brčko Distrikta BiH;
- l) utvrđuje prijedloge kandidata za organe Platforme;
- m) podstiče i organizuje promotivne aktivnosti, te organizuje odnose s javnošću na području djelovanja regionalne organizacije;
- n) raspravlja i zauzima stajališta o iznimno važnim političkim pitanjima iz rada lokalnih organizacija i ograna sa područja regionalne organizacije;
- o) dostavlja Predsjedništvu Platforme godišnji izvještaji o radu i program rada i finansijski plan za narednu godinu;
- p) sačinjava finansijski izvještaj za prethodnu godinu čiji sastavni dio čine i finansijski izvještaji općinskih/gradskih odbora i dostavlja ga u daljnju proceduru usvajanja utvrđenu Statutom;
- q) donosi poslovnik o radu regionalnog odbora;
- r) obavlja i druge poslove predviđene poslovnikom, Statutom i odlukama viših organa i tijela Platforme.

(2) Regionalni odbor donosi pravovaljane odluke natpolovičnom večinom prisutnih članova ako sjednici prisustvuje natpolovična većina ukupnoga broja članova regionalnog odbora.

**Član 59.**  
**(Sazivanje sjednice i zasjedanje regionalnog odbora)**

- (1) Sjednice regionalnog odbora saziva predsjednik regionalnog odbora, a održavaju se najmanje jednom mjesечно.
- (2) Predsjednik regionalnog odbora je dužan da sazove sjednicu u roku od 15 dana od dana prijema zahtjeva najmanje jedne trećine članova regionalnog odbora.
- (3) Obrazloženi zahtjev iz stava (2) ovog člana podnosi se u pisanim obliku i sadrži prijedlog dnevnog reda sjednice.
- (4) Ako predsjednik regionalnog odbora ne sazove sjednicu regionalnog odbora u skladu sa stavom (2) ovog člana, sjednicu saziva Predsjedništvo Platforme, u roku od 15 dana.

- (5) Osim na zahtjev članova regionalnog odbora u smislu stava (2) ovog člana, regionalni odbor se sazivai na zahtjev Predsjedništva Platforme koji predlaže dnevni red. Ako predsjednik regionalnog odbora ne zakaže sjednicu i ne održi je roku od 15 dana od dana prijema zahtjeva Predsjedništva Platforme, sjednicu regionalnog odbora saziva Predsjedništvo Platforme.
- (6) Ako sjednica regionalnog odbora nije održana tri mjeseca, Predsjedništvo Platforme ima obavezu da sazove sjednicu koja će se održati najkasnije u roku od 30 dana od dana isteka roka od tri mjeseca.
- (7) Sjednicama predsjedava predsjednik regionalnog odbora, a u slučaju spriječenosti zamjenjuje ga potpredsjednik. U slučaju dužeg odsustvovanja predsjednika, sjednicama regionalnog odbora predsjedava potpredsjednik.
- (8) Ako predsjedniku regionalnog odbora prestane mandat po bilo kojem osnovu, funkciju vršioca dužnosti predsjednika preuzima potpredsjednik i obavlja je do izbora novog predsjednika.

**Član 60.**  
**(Stručni odbor)**

- (1) Regionalni odbor imenuje stručni odbor, kao stalni organ.
- (2) Stručni odbor je sastavljen od predsjednika stručnih komisija, kojima rukovodi izvršni direktor regionalne organizacije.

**Član 61.**  
**(Nadležnosti stručnog odbora regionalne organizacije)**

Nadležnosti i način rada stručnog odbora regionalne organizacije utvrđuju se poslovnikom o radu, kojeg donosi regionalni odbor.

**Član 62.**  
**(Izvršni direktor regionalne organizacije)**

- (1) Izvršnog direktora regionalne organizacije imenuje regionalni odbor.
- (2) Mandat izvršnog direktora regionalne organizacije traje dok traje mandat regionalnog odbora.

**Član 63.**  
**(Nadležnosti izvršnog direktora regionalnog odbora)**

Nadležnosti izvršnog direktora regionalnog odbora su:

- a) provodi politiku Platforme u skladu sa Programskom deklaracijom Platforme, Statutom, odlukama, zaključcima i drugim aktima nadležnih organa Platforme, te

donosi izvršne političke odluke, uputstva, smjernice i druge akte na nivou regionalne organizacije;

- b) brine se i osigurava međusobnu saradnju i kordinaciju svih stručnih komisija;
- c) daje mišljenja o svim aktima i dokumentima koje stručne komisije predlažu regionalnom odboru;
- d) brine se o zaštiti i upotrebi arhivske građe i drugih dokumenata;
- e) obavlja i druge poslove po nalogu regionalnog odbora i drugih viših organa Platforme.

#### **Odjeljak B. Lokalna organizacija**

##### **Član 64. (Formiranje lokalne organizacije)**

- (1) Općinska/gradska organizacija se formira na inicijativu najmanje 15 članova Platforme na tom području.
- (2) Regionalni odbor može da donese odluku o formiranju lokalne organizacije i u slučaju manjeg broja podnositelja inicijative, ako ocijeni da je ta inicijativa opravdana.
- (3) Odredbe o formiranju, statusu i nadležnostima općinskih/gradskih odbora u Bosni i Hercegovini primjenjuju se na iste odbore u inostranstvu, a u skladu sa pozitivnopravnim propisima države u kojoj se formiraju.
- (4) Mjesne organizacije se formiraju na inicijativu najmanje sedam članova Platforme na tom području.

#### **Pododjeljak A. Organi na nivou općinske/gradske organizacije**

##### **Član 65. (Općinski/gradski organi i radna tijela)**

- (1) Organi općinske/gradske organizacije su:
  - a) Skupština općinske/gradske organizacije, u zavisnosti od njihovog statusa;
  - b) Općinski/gradski odbor, u zavisnosti od njegovog statusa;
  - c) Izborni štab;
  - d) Izvršni direktor;
  - e) kao i drugi organi na nivou općinske/gradske organizacije koji se formiraju u skladu sa ovim Statutom.

(2) Radna tijela općinske/gradske organizacije su:

- a) Stručni odbor;
- b) Stručne komisije;
- c) kao i druga radna tijela koja se formiraju na nivou općinske/gradske organizacije u skladu sa ovim statutom.

**Član 66.**  
**(Privremeni općinski/gradski odbor)**

- (1) Kada se steknu uslovi za organizovanje općinske/gradske organizacije, Predsjedništvo Platforme imenuje privremeni općinski/gradski odbor, od minimum tri člana i donosi poslovnik o njegovom radu.
- (2) Zadatak privremnog općinskog/gradskog odbora je da sazove skupštinu općinskog/gradskog odbora i izvrši sve pripreme za izabor organa u općinske/gradske organizacije u skladu sa Statutom.
- (3) Mandat privremenog općinskog/gradskog odbora prestaje izborom općinskog/gradskog odbora i drugih općinskih organa.

**Član 67.**  
**(Formiranje skupštine općinske/gradske organizacije)**

- (1) Općinska/gradska skupština formira se po predstavničkom principu, ako u općinskoj/gradskoj organizaciji ima više od 200 registrovanih članova.
- (2) Ukoliko u općinskoj/gradskoj organizaciji ima manje od 200 registrovanih članova, svi registrovani članovi sa područja te općine/grada su ujedno i delegati za skupštinu.
- (3) Zavisno od specifičnosti i broja članova svake općinske/gradske organizacije, u skladu sa članom 65. Statuta, skupština općinske/gradske organizacije donosi odluku o unutrašnjoj organizaciji i strukturi njenih organa.

**Član 68.**  
**(Skupština općinske/gradske organizacije)**

- (1) Općinska/gradska skupština može biti izborna, izvještajna i izborne-izvještajna.
- (2) Svi članovi mjesnih odbora su ujedno i delegati za Skupštinu općinskih/gradskih organizacija.
- (3) Općinska/gradska izborna skupština tajnim glasanjem i natpolovičnom većinom prisutnih delegata bira predsjednika, potpredsjednika i članove općinskog/gradskog odbora.

- (4) Mandat predsjednika, potpredsjednika i članova općinskog/gradskog odbora je četiri godine.
- (5) Općinska/gradska izvještajna skupština jednom godišnje razmatra i natpolovičnom većinom pristunih delegata usvaja izvještaj o radu općinskog/gradskog odbora za prethodnu godinu i program rada i finansijski plan za tekuću godinu.
- (6) Kvorum za rad skupštine je dvije trećine od ukupnog broja delegata skupštine.
- (7) Kvorum za donošenje odluka skupštine je natpolovična većina prisutnih delegata koji imaju pravo glasa.

**Član 69.**  
**(Nadležnosti skupštine općine/grada)**

Skupština općinske/gradske organizacije:

- a) donosi Poslovnik o radu i druge akte iz svoje nadležnosti;
- b) razmatra i ocjenjuje rad djelovanje organa općinske/gradske organizacije;
- c) raspravlja i prihvata izvještaj o radu organa općinske/gradske organizacije;
- d) bira i razrješava predsjednika, potpredsjednika i zapisničara skupštine općinske/gradske organizacije;
- e) bira i razrješava članove općinskog/gradskog odbora;
- f) bira i razrješava članove nadzornog općinskog/gradskog odbora;
- g) bira i razrješava članove Izbornog štaba općinskog/gradskog odbora;
- h) bira i razrješava izvršnog direktora općinskog/gradskog odbora;

**Član 70.**  
**(Općinski/gradski odbor)**

- (1) Općinski/gradski odbor čini najmanje pet članova, pri čemu je ukupan broj članova općinskog/gradskog odbora neparan.
- (2) Općinski/gradski odbor čine:
  - a) predsjednik;
  - b) potpredsjednik;

- c) izabrani načelnici, gradonačelnici, kao i njihovi zamjenici, te vjećnici u općinskom/gradskom vijeću ako su izabrani na tu funkciju, kao predstavnici Platforme, koji zastupaju interesu i ciljeve Platforme;
  - d) ili tri člana Platforme.
- (3) Predsjednika i potpredsjednika, kao i članove općinskog/gradskog odbora bira Skupština općinske/gradske organizacije.
- (4) Ukoliko nije moguće održati Skupštinu određene općinske/gradske organizacije, odluku o izboru članova općinskog/gradskog odbora, te općinske/gradske organizacije donosi Predsjedništvo Platforme.
- (5) Općinski/gradski odbor donosi, u skladu sa Statutom, Poslovnik o radu općinskog/gradskog odbora.
- (6) Izuzetno na prijedlog predsjednika općinskog/gradskog odbora, općinski/gradski odbor može da izabere i pridruži do jedne trećine dodatnih članova u odnosu na postojeći broj članova općinskog odbora, uz predhodnu saglasnost regionalnog odbora Platforme. Ako nije formiran regionalni odbor na području date općine/grada odluku o izboru i pridruživanju donosi Predsjedništvo Platforme.

**Član 71.**  
**(Nadležnosti općinskog/gradskog odbora)**

- (1) Općinski/gradski odbor nadležan je da:
- a) donosi Poslovnik o radu općinskog/gradskog odbora;
  - b) provodi odluke Skupštine Platforme i drugih nadležnih organa i tijela Platforme;
  - c) daje političke ocjene i utvrđuje političke stavove o pitanjima i pojavama na području na kojem djeluje;
  - d) upravlja općinskim/gradskim organizacijom između izbora;
  - e) osmišljava i organizuje djelovanje i provođenje politike Platforme, izvršenje programa te programskih načela i ciljeva na području na kojem djeluje;
  - f) podstiče omasovljenje članstva;
  - g) bira izvršnog direktora općinske organizacije;
  - h) osniva radna tijela i interesne grupe i koordinira njihov rad;

- i) sastavlja prijedlog lista kandidata i dostavlja je regionalnom odboru, te organizuje i provodi izbornu kampanju za izbore općinskog načelnika, odnosno gradonačelnika i njihovih zamjenika, te članova općinskog/gradskog vijeća;
  - j) predlaže koalicije u svojoj općini/gradu u skladu sa programskim načelima Platforme;
  - k) organizuje i podstiče dodatno obuku i usavršavanje svojih članova;
  - l) najmanje jednom u šest mjeseci razmatra rad svojih članova u organima i tijelima uprave općine/grada;
  - m) utvrđuje kandidate za organe i tijela Platforme;
  - n) podstiče i organizuje promotivne aktivnosti, te organizuje odnose s javnošću;
  - o) obavlja i druge poslove predviđene Poslovnikom, Statutom i odlukama viših organa i tijela Platforme.
- (2) Općinski/gradski odbor redovno informiše regionalni odbor o svom radu, a jednom godišnje podnosi mu izvještaj o radu i program rada i finansijski plan za narednu godinu.

**Član 72.**  
**(Način odlučivanja općinskih/gradskih odbora)**

Općinski/gradski odbor donosi pravovaljane odluke ako sjednici prisustvuje natpolovična većina ukupnog broja članova općinskog/gradskog odbora i ako je za odluku glasala natpolovična većina prisutnih članova izabralih na skupštini općinske/gradske organizacije.

**Član 73.**  
**(Sazivanje sjednice i zasjedanje)**

- (1) Sjednice općinskog/gradskog odbora održavaju se najmanje jednom mjesечно i saziva ih predsjednik općinskog/gradskog odbora.
- (2) Na zahtjev najmanje jedne trećine članova općinskog/gradskog odbora, predsjednik je dužan da sazove sjednicu odbora u roku od 15 dana od dana prijema zahtjeva.
- (3) Obrazloženi zahtjev iz stava (2) ovog člana podnosi se u pismenom obliku i sadrži prijedlog dnevnoga reda sjednice općinskog/gradskog odbora.
- (4) Ako predsjednik općinskog/gradskog odbora ne sazove sjednicu u skladu sa stavom (2) ovog člana, predsjednik nadređenog regionalnog odbora Platforme dužan je da, u istom roku, sazove sjednicu općinskog/gradskog odbora.

- (5) Ako predsjednik regionalnog odbora u datom roku ne sazove sjednicu općinskog/gradskog odbora, tada Predsjedništvo Platforme u roku od 15 dana donosi odluku o sazivanju sjednice.
- (6) Zahtjev za sazivanje sjednice općinskog/gradskog odbora, osim članova općinskog/gradskog odbora, može da uputi regionalni odbor i Predsjedništvo Platforme.
- (7) Ako na zahtjev iz stava (6) ovog člana predsjednik općinskog/gradskog odbora ne sazove sjednicu, tada odluku o sazivanju sjednice donosi regionalni odbor, odnosno Predsjedništvo Platforme, u zavisnosti od toga na čiji zahtjev se sjednica saziva.
- (8) Sjednicama općinskog/gradskog odbora predsjedava predsjednik, a u slučaju spriječenosti zamjenjuje ga potpredsjednik općinskog/gradskog odbora koji ima sva ovlaštenja predsjednika općinskog/gradskog odbora u vezi sa održavanjem sjednice kojom predsjedava.
- (9) Ako predsjedniku općinskog/gradskog odbora iz bilo kog razloga prestane mandat, funkciju vršioca dužnosti predsjednika preuzima potpredsjednik i on je obavlja do izbora novog predsjednika.

**Član 74.**  
**(Raspustanje općinskog/gradskog odbora)**

Predsjedništvo Platforme može da raspusti općinsku/gradsku organizaciju:

- a) kada ne zasjeda u potrebnom kvoru na najmanje tri uzastopne sjednice;
- b) ako redovno ne šalje izvještaje višim organima Platforme, ili
- c) ako lokalna organizacija ne djeluje u skladu sa ciljevima Platforme, odnosno ne provodi odluke viših organa Platforme.

**Član 75.**  
**(Izborni štab općinske/gradske organizacije)**

Način izbora, broj članova i djelokrug rada Izbornog štaba općinske/gradske organizacije, utvrđuje se pravilnikom kojeg donosi Predsjedništvo Platforme.

**Član 76.**  
**(Izvršni direktor općinske/gradske organizacije)**

- (1) Izvršnog direktora općinske/gradske organizacije imenuje općinski/gradski odbor.
- (2) Mandat izvršnog direktora općinske/gradske organizacije traje dok traje mandat općinskog/gradskog odbora.

**Član 77.**  
**(Nadležnosti izvršnog direktora općinskog/gradskog odbora)**

Nadležnosti izvršnog direktora općinske/gradske organizacije su:

- a) provodi politiku Platforme u skladu sa Programom, Statutom, odlukama, zaključcima i drugim aktima nadležnih organa Platforme, te donosi izvršne političke odluke, uputstva, smjernice i druge akte na nivou općinske/gradske organizacije;
- b) brine se i osigurava međusobnu saradnju i kordinaciju svih stručnih komisija;
- c) daje mišljenja o svim aktima i dokumentima koje stručne komisije predlažu općinskom/gradskom odboru;
- d) brine se o zaštiti i upotrebi arhivske građe i drugih dokumenata;
- e) obavlja i druge poslove po nalogu općinskog/gradskog odbora i drugih viših organa Platforme.

**Pododjeljak B. Organi na nivou mjesne organizacije**

**Član 78.**  
**(Formiranje mjesne organizacije)**

- (1) Mjesna organizacija se formira u svim mjesnim zajednicama u kojima je evidentirano najmanje sedam članova Platforme.
- (2) Mjesnu organizaciju čine svi članovi Platforme na području određene mjesne zajednice.
- (3) Ukoliko ne postoji mogućnost formiranja mjesne organizacije na određenom području lokalne mjesne samouprave zbog manjeg broja članstva, općinski/gradski odbor donosi odluku o formiranju jedne mjesne organizacije za područje više mjesnih zajedница.

**Član 79.**  
**(Skupština mjesne organizacije)**

- (1) Delegate Skupštine mjesne organizacije čine svi članovi Platforme sa područja određene mjesne zajednice koji se odazovu na redovnu godišnju skupštinu mjesne organizacije.
- (2) Svi članovi Platforme koji su izabrani na određene dužnosti unutar organa Platforme, ujedno su delegati skupštine mjesne organizacije prema mjestu prebivališta.

- (3) U slučaju promjene prebivališta i boravišta član Platforme se preko općinskog/gradskog odbora odjavljuje u matičnoj evidenciji i prijavljuje se u mjesnu organizaciju novog prebivališta i boravišta, te se uključuje u njen rad.
- (4) Kada član Platforme duže vrijeme boravi izvan područja svog prebivališta, tada se uključuje u rad mjesne organizacije u mjestu boravišta.
- (5) Ukoliko član Platforme ne postupa u skladu sa st. (2), (3) i (4) ovog člana, smatra se da ne postupa u skladu sa obavezama utvrđenim Statutom.
- (6) Prvu skupštinu određene mjesne organizacije saziva koordinator mjesne zajednice, koga imenuje općinski/gradski odbor.
- (7) Skupština mjesne organizacije je izborna, izvještajna i izborne-izvještajnog karaktera i održava se najmanje jednom godišnje.
- (8) Skupština mjesne organizacije bira predsjednika i članove mjesnog odbora, donosi godišnji program rada i razmatra godišnji izvještaj o radu mjesnog odbora.
- (9) Skupština mjesne organizacije bira delegate u skupštinu općinske/gradske organizacije Platforme.
- (10) Zavisno od specifičnosti i broja članova svake mjesne organizacije, skupština mjesne organizacije donosi odluku o unutrašnjoj organizaciji i strukturi njenih organa.

**Član 80.**  
**(Mjesni odbor)**

- (1) Mjesni odbor u pravilu broji pet do 15 članova koji su birani u skladu sa pravilima izbornog postupka Platforme i svi članovi koji se odazovu na izbornu skupštinu mjesne organizacije mogu birati i biti birani u mjesni odbor.
- (2) Mjesni odbor čine:
  - a) predsjednik;
  - b) sekretar i
  - c) najmanje tri člana mjesne organizacije.
- (3) Mjesni odbor i predsjednik mjesnog odbora biraju se na period od četiri godine.

**Član 81.**  
**(Nadležnosti mjesnog odbora)**

- (1) Nadležnosti mjesnog odbora su:

- a) inicira i usmjerava političku aktivnost Platforme u mjesnoj organizaciji i prati njezino ostvarivanje;
  - b) sagledava stanje, evidentira probleme i predlaže organima općinske/gradske organizacije mјere u cilju unapređenja života stanovnika određene mjesne zajednice;
  - c) realizuje odluke viših organa Platforme;
  - d) donosi Poslovnik o radu mjesnog odbora;
  - e) obavlja i druge zadatke u skladu sa Poslovnikom o radu mjesnog odbora, Statutom i odlukama viših organa Platforme.
- (2) Predsjednik mjesnog odbora rukovodi radom mjesnog odbora, redovno obavještava članstvo o svim poduzetim aktivnostima, te predsjednika i izvršnog direktora općinskog/gradskog odbora o svim usvojenim inicijativama i odlukama.

**Član 82.**  
**(Način odlučivanja mjesnog odbora)**

Mjesni odbor donosi pravovaljane odluke ako sjednici prisustvuje natpolovična većina ukupnog broja članova mjesnog odbora i ako je za odluku glasala natpolovična većina prisutnih članova mjesnog odbora.

**Član 83.**  
**(Zakazivanje sjednice i zasjedanje mjesnog odbora)**

- (1) Sjednice mjesnog odbora održavaju se najmanje jednom mjesечно i saziva ih predsjednik mjesnog odbora.
- (2) Na zahtjev najmanje jedne trećine članova mjesnog odbora, predsjednik je dužan da sazove sjednicu odbora u roku od 15 dana od dana prijema zahtjeva.
- (3) Obrazloženi zahtjev iz stava (2) ovog člana podnosi se u pismenom obliku i sadrži prijedlog dnevnoga reda sjednice mjesnog odbora.
- (4) Ako predsjednik mjesnog odbora ne sazove sjednicu u skladu sa stavom (2) ovog člana, predsjednik nadređenog općinskog/gradskog odbora Platforme dužan je da, u istom roku, sazove sjednicu mjesnog odbora.
- (5) Zahtjev za sazivanje sjednice mjesnog odbora može uputiti i nadređeni općinski/gradski odbor.
- (6) Sjednicama mjesnog odbora predsjedava predsjednik, a u slučaju spriječenosti zamjenjuje ga član mjesnog odbora kojeg ovlasti predsjednik mjesnog odbora;.

(7) Ako predsjedniku mjesnog odbora iz bilo kog razloga prestane mandat, funkciju vršioca dužnosti predsjednika preuzima član mjesnog odbora kojeg imenuje općinski/gradski odbor i on je obavlja do izbora novog predsjednika.

### **POGLAVLJE III - RADNA TIJELA PLAFORME**

#### **Odjeljak A. Ekspertni savjeti**

##### **Član 84. (Formiranje ekspertnih savjeta)**

- (1) Ekspertni savjeti su ekspertna savjetodavna tijela Platforme, a osnivaju se za pojedina područja javnih politika koja su važna za političku djelatnost Platforme.
- (2) Predsjedništvo Platforme svojom odlukom formira i imenuje ekspertne savjete u skladu sa potrebama Platforme, te regulira njihov broj i način rada.
- (3) Predsjednik i članovi savjeta biraju se među istaknutim stručnjacima Platforme za pojedine javne politike ili stručnjacima koji nisu članovi političkih stranaka, a visoko su moralna lica koja prihvataju Statut, Etički kodeks i Program Platforme.

##### **Član 85. (Mandat članova ekspertnih savjeta)**

- (1) Mandat predsjednika i članova ekspertnih savjeta traje do isteka mandata organa koji je donio odluku o njegovom uspostavljanju, osim ako to nije drugačije regulisanom ovim Statutom.
- (2) Članovi ekspertnih savjeta mogu biti razriješeni i prije isteka vremena na koje su imenovani zbog osobnih razloga ili zbog neizvršavanja obaveza u savjetu.

#### **Pododjeljak A. Državni savjet Platforme**

##### **Član 86. (Formiranje Državnog savjeta Platforme)**

- (1) Državni savjet Platforme je stalno radno tijelo Platforme koje su osniva radi okupljanja progresivnih i konstruktivnih snaga iz Bosne i Hercegovine i dijaspore radi formiranja mišljenja o ciljevima, procesima, institucijama i resursima od strateške važnosti za dugoročni razvoj Bosne i Hercegovine.
- (2) Član Državnog savjeta može da bude bilo lice iz zemlje i inostranstva koje ima sposobnost, integritet i želju da pomogne Bosni i Hercegovini.
- (3) Članstvo u Platformi za Progres nije preduslov za članstvo u Državnom savjetu.
- (4) Predsjednika Državnog savjeta imenuje i razrješava Predsjedništvo Platforme na prijedlog jedne trećine članova Predsjedništva Platforme.

- (5) Članove Državnog savjeta bira i razrješava Predsjedništvo Platforme u dogovoru s predsjednikom Državnog savjeta.
- (6) Članstvo u Državnom savjetu otvoreno je svim političkim organizacijama, pojedincima, organizacijama i institucijama iz cijelog svijeta.
- (7) Državni savjet nema određen broj članova.
- (8) Član Državnog savjeta bira se na period od šest godina uz mogućnost ponovnog izbora.

**Član 87.**  
**(Rad Državnog savjeta)**

- (1) Uloga Državnog savjeta je da podnosi inicijative i daje preporuke Predsjedništvu Platforme u vezi svih državnih pitanja, te pitanja od društveno-političkog i ekonomskog značaja.
- (2) Državni savjet donosi Poslovnik o svom radu kojim se utvrđuje način djelovanja, organizovanja i koordinacije rada.
- (3) Predsjedništvo Platforme daje saglasnost na Poslovnik o radu Državnog savjeta.

**Pododjeljak B. Statutarna komisija**

**Član 88.**  
**(Formiranje, sastav i rad Statutarne komisije)**

- (1) Statutarna komisija je ekspertno savjetodavno tijelo, koje odlukom formira Predsjedništvo Platforme, imenuje njene članove, te regulira njen način rada.
- (2) Statutna komisija ima pet članova, koji su istaknuti stučnjaci pravne struke.
- (3) Predsjednika Statutarne komisije imenuje Predsjedništvo.

**Član 89.**  
**(Mandat Statutarne komisije)**

Mandat predsjednika i članova Statutarne komisije traje četiri godine.

**Član 90.**  
**(Nadležnosti Statutarne komisije)**

- (1) U skladu sa svojim Poslovnikom o radu, Statutarna komisija donosi odluke i mišljenja.
- (2) Statutarna komisija je nadležna da:

- a) donosi Poslovnik o radu;
- b) prati primjenu Statuta i daje mišljenje o usklađenosti općih akata organa i tijela Platforme sa važećim propisima Bosne i Hercegovine, Statutom i Programom;
- c) predlaže izmjene i dopune Statuta;
- d) izrađuje nacrt statuta, odnosno izmjena i dopuna Statuta;
- e) po potrebi izrađuje prečišćeni tekst Statuta;
- f) daje mišljenje po podnesenim pismenim zahtjevima za autentično tumačenje odredbi Statuta i drugih akata Predsjedništva;
- g) Predsjedništvu podnosi godišnji izvještaj o svom radu.

**Član 91.**  
**(Autentično tumačenje)**

(1) Autentično tumačenje je opći akt kojim se utvrđuje zakonitost, vjerodostojnost, izvornost i pravilan smisao nedovoljno jasne odredbe Statuta odnosno odluke ili drugog općeg akta Predsjedništva.

(2) Autentično tumačenje se primjenjuje i važi do dana primjene Statuta odnosno odluke za koju se daje autentično tumačenje.

(3) Obrazloženi prijedlog za davanje autentičnog tumačenja odredbe Statuta odnosno odluke ili drugog općeg akta Predsjedništva, podnosi se Predsjedništvu uz obavezno navođenje odredbe za koju se traži tumačenje.

(4) Predsjedništvo upućuje prijedlog za davanje autentičnog tumačenja Statutarnoj komisiji.

(5) Statutarna komisija ocjenjuje da li je prijedlog za davanje autentičnog tumačenja osnovan.

(6) Ako utvrdi osnovanost prijedloga iz stava (1) ovog člana, Statutarna komisija daje svoje mišljenje i sačinjava prijedlog teksta autentičnog tumačenja i dostavlja ga Predsjedništvu.

(8) Ako Statutarna komisija ocijeni da prijedlog za davanje autentičnog tumačenja nije osnovan, o tome će izvestiti Predsjedništvo.

(9) Konačnu odluku o osnovanosti prijedloga za autentično tumačenje donosi Predsjedništvo.

**Član 92.**

**(Izrada prečišćenog teksta)**

- (1) Odlukom ili drugim općim aktom Predsjedništva može se utvrditi da Statutarna komisija uradi prečišćeni tekst Statuta odnosno odluke ili drugog općeg akta Predsjedništva.
- (2) Prečišćeni tekst iz prethodnog stava utvrđuje se na sjednici Statutarne komisije i sadrži samo integralni tekst akta čiji se prečišćeni tekst utvrđuje.
- (3) Prečišćeni tekst Statuta odnosno odluke ili drugog općeg akta Predsjedništva se primjenjuje od dana kada je objavljen na službenoj stranici Platforme, a važnost odredaba utvrđena je u aktima koji su obuhvaćeni prečišćenim tekstrom.
- (4) Kada se nakon objavljivanja prečišćenog teksta Statuta odnosno odluke ili drugog općeg akta Predsjedništva predloži izmjena ili dopuna, ove izmjene ili dopune odnose se na odredbe u prečišćenom tekstu.

**Odjeljak B. Tehničke komisije**

**Član 93.**

**(Uspostavljanje tehničkih komisija)**

- (1) Radi praćenja stanja u područjima iz nadležnosti svih organizacionih oblika Platforme, za izvršavanje pojedinih složenih zadataka koji zahtjevaju rad stručnih lica iz više oblasti, davanje prijedloga i mišljenja o pitanjima iz nadležnosti Platforme, izrade analiza i informacija na temelju odgovarajućih podataka; te za izvršavanje drugih zadataka od interesa za građane na području Bosne i Hercegovine, Platforma uspostavlja tehničke komisije kao stalna radna tijela.
- (2) Posebnom odlukom o uspostavljanju tehničkih komisija iz stava (1) ovog člana, Predsjedništvo kao i regionalni odbori, općinski/gradski odbori i mjesni odbori imenuju članove tehničkih komisija iz reda članova Platforme sa područja djelovanja.
- (3) Za člana tehničke komisije može biti izabrana i nestramačka osoba visokih moralnih vrijednosti koja nije član Platforme, ali koja svojim znanjem i izuzetnom stručnošću iz oblasti koja je u nadležnosti tehničke komisije je opredjeljena da da svoj puni doprinos u radu.
- (4) Broj članova tehničke komisije nije ograničen.
- (5) Jedan član Platforme može biti član više tehničkih komisija, zavisno od svoje spremnosti za rad, znanja i stručnosti.

**Član 94.**  
**(Mandat članova tehničkih komisija)**

- (1) Mandat predsjednika i članova tehničke komisije traje do isteka mandata organa koji je donio odluku o njenom uspostavljanju.
- (2) U skladu sa poslovnikom o radu tehničke komisije, predsjednik i članovi tehničke komisije mogu biti razriješeni i prije isteka vremena na koje su imenovani zbog osobnih razloga ili zbog učestalog neopravdanog izostanka sa sjednica ili zbog neizvršavanja zadataka u tehničkoj komisiji.
- (3) Prijedlog za razrješenje iz stava (2) ovog člana može podnijeti tehnička komisija ili predsjednik organa koji ju je imenovao.
- (4) Predsjednik i član tehničke komisije može podnijeti ostavku na funkciju na koju je izabran.

**Član 95.**  
**(Rad tehničkih komisija)**

- (1) Tehnička komisija radi na sjednicama, u skladu sa Poslovnikom o radu tehničke komisije kojeg donosi organ koji ju je osnovao.
- (2) Tehnička komisija na sjednicama pokreće razmatranje pitanja iz svog djelokruga utvrđenog posebnom odlukom o svom osnivanju, a obavezna je razmotriti i svako drugo pitanje iz svog djelokruga koje joj uputi na razmatranje organ koji ju je osnovao i o svojim mišljenjima, stajalištima, prijedlozima i primjedbama ga izvjestiti.
- (3) Na prijedlog tehničke komisije predsjednik tehničke komisije može pozivati istaknute naučnike i stručnjake, te druge osobe koje nisu članovi Platforme radi pribavljanja njihovog mišljenja o pitanjima o kojima se raspravlja na sjednici.
- (4) Tehničke komisije surađuju međusobno, mogu održati i zajedničke sjednice, te podnosići zajednički izvještaj o temi rasprave ili o svojim mišljenjima, stajalištima, preporukama i prijedlozima.
- (5) Po potrebi, kada ocjeni da bi se na taj način bolje obavila rasprava o nekim bitnim pitanjima ili bolje izvršili zadaci tehničke komisije, predsjednik tehničke komisije može predložiti formiranje novih sekcija unutar tehničke komisije ili započinjanje novog projekta.
- (6) Na početku kalendarske godine tehničke komisije predlažu organu koji ih je osnovao svoj program rada koji sadrži aktivnosti, vremenske rokove za realizaciju istog i očekivane rezultate.
- (7) Tehničke komisije su dužne organu koji ih je osnovao dostaviti tromjesečne izvještaje o svom radu u kojima se prezentira koji ciljevi su ostvareni i koji zadaci su i u kojoj mjeri realizirani. U izvještajima se obavezno navode poteškoće u radu, predlažu mjere za unapređenje rada i blagovremenu realizaciju dodjeljenih zadataka.

(8) Sve što nije utvrđeno Statutom, a odnosi se na rad tehničkih komisija bit će utvrđeno posebnim odlukama organa koji uspostavljaju njihov rad kao i Poslovnikom o radu tehničkih komisija iz stava (1) ovog člana.

**Odjeljak C. Akademija Platforme za progres**

**Član 96.**  
**(Osnivanje Akademije za progres)**

- (1) Akademiju za progres osniva Predsjedništvo Platforme.
- (2) U okviru Akademije za progres formiraju se stručna i savjetodavna vijeća za određene oblasti javnih politika.

**Član 97.**  
**(Rad Akademije za progres)**

- (1) Za svoj rad Akademija za progres odgovara izvršnom direktoru i Predsjedništvu Platforme.
- (2) Odluku o unutrašnjoj organizaciji, nadležnostima i procesu rada donosi Predsjedništvo Platforme.

**Odjeljak D. Asocijacija mladih**

**Član 98.**  
**(Organizovanje Asocijacije mladih)**

- 1) U okviru Platforme može se osnovati radno tijelo Asocijacija mladih kao interesno-politički oblik organizovanja koje okuplja članove Platforme do navršenih 30 godina starosti na početku njihovog mandata.,,
- 2) Predsjedništvo Platforme donosi odluku o organizovanju Asocijacije mladih.
- 3) Asocijacijom mladih rukovodi predsjednik i Predsjedništvo Asocijacije mladih.
- 4) Predsjednik i Predsjedništvo Asocijacije mladih bira se na skupštini Asocijacije mladih.

**Član 99.**  
**(Rad Asocijacije mladih)**

- (1) Skupština Asocijacije mladih donosi Poslovnik o svom radu kojim se utvrđuje način djelovanja, organizovanja, nadzor i koordinacija rada Asocijacije mladih Platforme.
- (2) Predsjedništvo Platforme daje saglasnost na Poslovnik o radu Asocijacije mladih.
- (3) Asocijacija mladih učestvuje u svim raspravama o ključnim političkim pitanjima Bosne i Hercegovine, kao i o svim ključnim pitanjima Platforme, evidentira i ističe kandidate

za sve funkcije i u sve organe Platforme kao i za funkcije u predstavničkim i izvršnim organima.

## **DIO PETI - FINANSIRANJE I IMOVINA PLATFORME**

### **Član 100. (Raspolaganje imovinom)**

- (1) Platforma može da ima pokretnu i nepokretnu imovinu i finansijska sredstva.
- (2) Odluku o kupovini pokretne imovine (kancelarijska oprema, motorna vozila i slično) i načinu raspolaganja pokretnom imovinom donosi Predsjedništvo Platforme.
- (3) Odluku o kupovini nepokretne imovine (nekretnine, zemljište i slično) i načinu raspolaganja nepokretnom imovinom donosi Predsjedništvo Platforme.
- (4) Odluku o materijalnom poslovanju i drugim novčanim ulaganjima donosi Predsjedništvo Platforme.
- (5) Odluku o nabavci kancelarijskog materijala i opreme neophodne za nesmetan rad Platforme, kao i drugog potrebnog materijala za nesmetan rad organa Platforme, donosi izvršni direktor Platforme.

### **Član 101. (Finansiranje Platforme)**

- (1) Platforma se finansira putem:
  - a) članarine;
  - b) drugih izvora u skladu sa zakonom.
- (2) Način rada i upravljanja finansijskim poslovanjem Platforme uređuje se Pravilnikom o finansijskom poslovanju koji donosi Predsjedništvo Platforme.
- (3) Platforma prihvata dobrovoljne priloge, poklone i zavješća ako se time neće kompromitovati.
- (4) Za davanje izjava o prihvatanju nadležan je odbor organizacije kojoj je poklon, dobrovoljni prilog ili zavješće učinjeno, a ako se radi o nekretninama Predsjedništvo Platforme.

## **DIO ŠESTI - NAČIN PRESTANKA RADA PLATFORME I RASPODJELA IMOVINE**

### **Član 102. (Prestanak rada Platforme)**

Platforma prestaje s radom u skladu sa zakonom.

**Član 103.**

**(Odluka o prestanku rada)**

- (1) Odluku o prestanku rada Platforme donosi Kongres Platforme.
- (2) U izuzetnim slučajevima, odluku o prestanku rada može da doneše i Predsjedništvo Platforme, na prijedlog predsjednika Platforme.
- (3) Odluka o prestanku rada Platforme obavezno sadrži odredbu kojom se utvrđuje krajnji korisnik imovine Platforme.

**DIO SEDMI — PRELAZNE I ZAVRSNE ODREDBE**

**Član 104.**

**(Donošenje Statuta i prelazna odredba)**

- (1) Izmjene i dopune Statuta vrše se na način i po postupku utvrđenom za njegovo donošenje.
- (2) Organi Platforme kao i sve teritorijalne organizacije i njihovi organi dužni su uskladiti svoja akta sa odredbama ovog statuta u roku od 90 dana od dana stupanja na snagu ovog statuta.

**Član 105.**  
**(Završna odredba)**

- (1) Ovaj statut stupa na snagu i primjenjuje se danom donošenja. Statut će biti objavljen na službenim stranicama Platforme.
- (2) Danom stupanja na snagu ovog statuta Platforme, prestaje da važi Statut Platforme za progres donesen na osnivačkoj Skupštini Platforme za progres održanoj 25. novembra 2018. godine.

Broj: \_\_\_\_\_ /19

Banja Luka, 24.11.2019.godine



Predsjednik Skupštine

„Platforma za progres“

*Ivana Šulić*